

Blutta amiez las vaccas

La protagonista dalla suandonta historia ha riscuotuto dabia per far ina fotografia ensem cullas vaccas-mumma ed ils vadials – per cletg eis ella mitschada culla tema. Esser memia gagliards per far selfies espectaculars sa numnadamein esser dètg prigulus.

SUSI ROTHMUND/FMR

«Tgè vadiala», schessan ils Tuatschins. E propi, empau da vadiala ei la matta giuvna schon sedepurtada tscheidi sil Pass Alpsu. Enzacons hosps sillas terrassas dallas ustrias sil Pass Alpsu ni era viandonts ein davantai perdetga da si'acziun fasierlia e beinenqualin ha nezegiau la caschun da fotografar ella. Era la FMR ha survegniu fotografias. Sin quellas eis ei buca da veser la massa, mo aschia ei la fantasia dil tuttafatg libra. Als vadials ha la viseta dalla dunschala apparentamein plaschiu ed in ha perfin gudiu sias carsinadas.

Da scurlar il tgau

Ei dat propi nuot ch'ei dat buc e sin tgei idea la giuvna da pressapauc vegn onns ei vegnida, fa mo scurlar il tgau. Quei sa gie ussa bein gleiti il «pli davos turist» ch'ins va buca sur ina seiv en nua ch'ei ha ina muntanera. Adina puspei datti denton da quels che manegian ch'ei fetschi nuot e san lu buca capir sche las vaccas-mumma attaccan els per schurmegiar lur vadials.

Giuvna e da buna fei

La giuvna sigl Alpsu ha giu cletg. Ella ei denton buc ida tras la muntanera per viandar mo bein per fotografar. Tut tenor il motto «sin l'alp datti negins puccaus» eis ella ida sur la seiv e



L'jamna vargada ha ina matta riscuotuto sia veta per far selfies amiez ina muntanera da vaccas-mumma sil Pass Alpsu. Strusch da veser – mo ella era blutta e gest aschia ha ella era stuiu scappar cun ina vacca ha vuliu attaccar ella per schurmegiar siu vadi.

FOTO MAD

in marcu ed ella hagi fatg l'impressiun dad esser empauet naiva.

Il vadi ha schau plascher

Far selfies mo cun vaccas e vadials ei stau memia pauc spectacular per la matta e perquei eis ella sedeliberada da sia vestgadira, toc per toc. Sco Diu ha schaffiu ella ei la giuvna gagliarda sevischinada ad in vadi e ha strihau quel. Sco ella ha raquintau pli tard hagi il vadi schau plascher quei ed eri zun confidents. Mo lu tuttenina seigi ina vacca cun corna vegnida encunter ad ella – pli e pli spert.

Scappada tut niua

La matta ha pigliu tema ed ei scappada tut tgilblut aschi spert sco ella ha pudiu. Siu resti ha ella aunc pudiu tier. Il handy culs selfies che havessen bunamein custau la veta ad ella ha la biala niua denton piars enzanua silla fuigia. Il telefonin culs custeivels selfies ei restaus anavos sin pastira denter las vaccas. La curascha da turnar el clauder per quel ha la giuvnetta buca giu pli. Igl ei denton reussiu alla matta d'anflar enzacons viandonts che han fatg quei survetsch per ella – secapescha pér cu las vaccas-mumma ed ils vadials eran sin ina buna distanza. Suententer l'acziun ei la giuvna vegnida dumandada, schebein ella hagi silmeins empriu enzatgei entras quell'aventura ed ella hagi rispundiu cun «gie». Sche lu, lein sperar il meglier.

COMMENTARI

Selfiemortale

SUSI ROTHMUND/FMR

«Tgè vadiala» da riscar la veta per in selfie. Numnar vadiala ina matta giuvna ei propi buca grad hoffi – ins vegli perstgisar. Mo empau da vadi eis ella bein sestellegiada. Schegie, atgnamein ei quei discreditau il vadi, pertgei in vadi fagess buc aschi tup. Strusch da crer tgei che certa glieud fa tut per empau atenziun e likes ellas medias socialas.

Esser memia gagliards per far selfies espectaculars sa numnadamein tuttavia esser mortal e carsinar vadials amiez ina muntanera da vaccas-mumma ei pli che fasierli. Che la matta era blutta ha probablamein disturbau il pli pauc la vacca. Tuttina havess ella

giu mustgas da prender la dunschala sillas cornas.

Adina puspei rescian ils carstgauns amoderns damemia per ina fotografia da regurdientscha e sigl entir mund dat ei perfin dapli morts duront far selfies ch'entras attaccas da squagls. Influencers ed auters semettan en posa orasum in grep, sils tschabergals d'ina punt, sisum in péz ni amiez in flum u sillas rodaglias.

Mintg'onn caschunan talas tuppaddas in tschuat morts ed il mender ei ch'ils influencers animeschan auters da far suenter, da visitar ils medems plazs e da semetter leu en scena per ina fotografia spectaculara. Tuttenina ein quels loghens «hotspots» e buca paucs ston vegnir serrai per scadin access.

Igl ei modern da far talas fotografias e quellas vegnan buca semplamein numnadas selfie mobein «killfie». Tals maletgs nua ch'enzatgi ei semess en prighel genereschon massa likes e commentaris e quei ei la finamira. «Killfies» san ins buca mo far en hotspots sco ils Grand Canyon ni Creux-du-Van mobein era sin il Pass Alpsu. Ei vegn denton propi scussegliau da copiar l'idea.

La giuvna sigl Alpsu ha provocau LCun semetter en scena e strihar il vadi, ella ha denton giu cletg e ha pudiu scappar. Lein sperar che la matta hagi survegniu ina lecziun per la veta e laschi la detta da «killfies». Viver e guder la veta vala bein bia dapli ch'in pér likes.

Fiera da fina bialaura



In'impresion dalla fiera dil Pass Alpsu ier suentermiezdi sin 2046 meters sur mar.

FOTO SUSI ROTHMUND

FALERA



Sonda proxima, ils 11 da settember ei il Trio Fontane d'udir en La Fermata a Falera.

FOTO MAD

Concert da combra cul Trio Fontane

Sonda, ils 11 da settember 2021, allas 20.00 concertescha il Trio Fontane a Falera en La Fermata. Cun Noëlle Grüber (violina), Jonas Kreienbühl (violoncello) ed Andrea Wiesli al piano sa igl auditori selegrar d'ina sera da concert da combra extraordinaria cun ovras da Joseph Haydn, Raffaele d'Alessandro e Ludwig van Beethoven.

Dapi 20 onns fascineschan las duas musicistas ed il musicist il publicum cun lur interpretaziuns ed ideas musicalas. Il 2002 ein la violinista Noëlle Grüber, il violoncellist Jonas Kreienbühl e la pianista Andrea Wiesli seformai al trio da piano. Gia il 2007 ei la formaziun vegnida distinguida alla concorrenza da musica da combra dil «Migros Kulturprozent» sco meglier trio da piano. Sur plirs onns ha il trio sviluppu cun success in'activitad da concert en Svizra ed egl'exteriur cun puncts culminonts sin tribunas da renum. Leutier vegnan regularmeins transmissiuns da radio che documenteschan la lavur artistica dil Trio Fontane ed augmentan lur reputaziun. Sco ils responsabels da La Fermata scrivon en in communicau als mieds da massa ein era lur registraziuns per discs cumpacts adina puspei d'udir al radio e survegnan mo las meglieras criticas. Il concert da combra a Falera porscha la pusseivladad d'udir per l'emprema gada il Trio Fontane live en nosa regiun. (cdm/fmr)

www.lafermata.ch per preventida ed ulteriuras informaziuns
www.triofontane.ch

VAL S. PIEDER

Nova cascharia

Coop segirescha il futur dalla cascharia bio a Val s. Pieder. Tenor in communicau als mieds da massa eis ei reussiu da rimnar 280 000 francs cun l'acziun tradiziunala d'emprema d'uost da vender paunins e cervelats. Il padrineda da Coop per regiuns muntagnardas ha alzau quella summa sin 700 000 francs. Quella summa vegn ussa dabien alla bio-sennaria a Val s. Pieder. Ils cundrezs da produziun ein vegls ed era in tschaler da caschiel ei necessaris. Cul niev bagherg dalla cascharia vegn l'economia per latgiras mantenida era el futur. (cdm/fmr)



Il futur dalla sennaria Val s. Pieder ei segiraus grazia al sustegn dil padrineda da Coop per regiuns muntagnardas.

FOTO MAD

BREIL E TRUN

Circus Maramber

Il circus grischun Maramber gastescha quest meins a Breil ed a Trun. Tenor il motto «no risk no fun» ha il Circus Maramber entschiet l'entschatta zercladur sia emprema sesiun sut la direziun da Ramona e Marco Berger.

Il circus ha success e sco ils responsabels scrivon, ein las presentaziuns beinfrequentadas. Il program niev ed internaziunal ei pleins da sensaziuns e surpras. Denter auter sepresentan «cars-tgauns sgulonts» inclus il salto mortale. Il duo Fantastic tschaffa il publicum cun sia acrobatica cun sutgas. Cun in veritabel thriller fan ils frars Hermanos Acero surstar il publicum cun lur numera da posamaun ed aunc biaras autras e biars auters artists procuran per divertiment e pialgaglia. Dils 15 entochen ils 19 da settember gastescha il Circus Maramber a Breil sil parcadì dallas pendicularas. Dils 22 entochen ils 26 da settember eis el a Trun sil prau davos la piazza da ballapei. Las presentaziuns han mingamai liug mesjamna, venderdis e sonda allas 15.00 ed allas 19.00, sco dumengia allas 11.00. (cdm/fmr/sr)

Ulteriuras informaziuns e biglietti dat ei sut www.circusmaramber.ch